



後漢光武皇帝紀卷第四

袁宏

晉書袁宏傳

二年春正月甲子朔日有蝕之本志曰日者陽精人君之象也君道虧故日爲之蝕諸侯順從則爲王者諸侯專權則疑在日於是在危十度齊之分野張步未宥之應也封諸有功者二十人更封鄧禹爲梁侯吳漢爲廣平侯各食四縣諸將各言所欲封唯景丹辭櫟陽丁綝請鄉亭上謂丹曰關東數縣不當櫟陽萬戶富貴不歸故鄉如衣錦夜行丹謝而受之或謂丁綝曰人皆求縣子何取鄉邪綝曰昔孫叔敖受封必求堯堉之地今綝能薄功淺豈可遇厚哉壬辰立宗廟社稷于洛陽漁陽太守彭寵涿郡太守張豐反

銅馬餘人上率諸將追之師及於薊彭寵郊迎謁見
意頗不滿上知寵不說以問幽州牧朱浮浮曰前吳
漢北發兵時上遣寵以所服劔又手書慰納用爲北
面主人寵望上至當迎問握手特異於衆也今誠失
望上曰何等子而望獨異乎浮因曰王莽爲宰衡時
甄豐旦夕論議於前常言夜半客甄長伯及莽即位
後豐見疎不說父子誅死上大笑曰不及於此是時
朱浮爲牧年少昭厲治迹辟州郡名士招王莽時故
吏二千石皆置幕府欲收禮賢之名多發漁陽倉穀
給其貧民寵以爲天下未平軍旅並發不宜多置官
屬費耗倉穀頗不從其令浮性隘急發於睚眦因峻

文法以司察寵寵亦自伐其功以爲羣臣莫能及吳
漢王梁爲三公寵所遣也寵曰如此我當爲王今但
若是陛下忘我邪是時北州殘破漁陽獨完有鹽鐵
之積寵多買金寶浮數奏之上輒漏泄令寵聞以脅
恐之是春遣使徵寵寵上書願與朱浮俱徵又與吳
漢王梁蓋延書自陳無罪爲朱浮所侵上不許而漢
等亦不敢報書寵旣自疑其妻勸寵曰天下未定四
方各自爲雄漁陽大郡兵馬最精何故爲人所奏而
棄此去寵與所親人議皆勸寵反上遣寵從弟子后
蘭卿喻寵寵因留之遂發兵反攻朱浮分兵擊旁郡
上谷太守耿况遣子舒將突騎救浮寵兵乃退上遣

游擊將軍鄧隆軍於潞浮軍雍奴相去百餘里遣吏
奏狀曰旦暮破寵矣上大恐曰處營非也軍必敗比
汝歸可知也寵遣萬餘人長潞西與險相距而使精
騎二千從潞南濟河襲隆營大敗之浮遠不能救引
兵而却吏還說上語皆以爲神也真定王劉楊謀反
使耿純持節收楊純既受命若使州郡者至真定止
傳舍楊稱疾不肯來與純書欲令純往純報曰奉使
見王侯牧不得先往宜自強來時楊弟林邑侯讓從
兄紺皆擁兵萬餘人楊自見兵強而純意安靜即從
官屬詣傳舍兄弟將輕兵在門外楊入見純接以禮
敬因延請其兄弟皆至純閉門悉誅之勒兵而出真

定振怖無敢動者純還京師自請曰臣本吏家子孫
幸遭大漢復興聖帝受命位至列將爵爲通侯天下
略定臣無所用志願試治一郡盡力以自効上笑曰
卿復欲治人自著邪乃拜純爲東郡太守詔純將兵
擊泰山濟南平原數郡皆平之居東郡數年抑強扶
弱令行禁止後坐殺長吏免以列侯奉朝請嘗從上
東征過東郡百姓老小數千人隨車駕啼泣曰願得
耿君上謂公卿曰純年少被甲胄爲軍治郡何能見
思若是百官咸嗟歎之更始諸將多據南陽聞更始
死世祖起河北皆勒兵爲亂上會諸將以檄叩地曰
郾最強宛次之誰當擊郾者賈復率然對曰臣請擊

鄧上笑曰執金吾擊鄧吾復何憂大司馬當擊宛於是賈復擊鄧吳漢擊南陽皆平之漢縱兵掠新野破虜將軍鄧奉新野人也怒漢暴已邑勒兵反襲漢敗之三月乙酉大赦天下詔曰惟酷吏殘賊用刑深刻獄多寃人朕甚愍之孔子不云乎刑罰不中則民無所措手足其與諸中二千石諸大夫議省刑罰更始之敗劉永以兵略地北至河南及陳汝以周建爲將軍蘇茂爲大司馬遣使拜張步爲齊王董宮爲西海王夏四月蓋延王霸等擊劉永永守城不出晝收其麥夜襲其城永大驚引兵走延逆擊大破之永棄其軍輕騎將母妻奔虞虞人反殺其母妻永與麾下數

十人奔譙蘇茂周建將三萬人攻延於浦西延逆擊大破之茂保廣樂永保胡陵世祖使太中大夫戴兢使兗州東昏人執以詣永兢罵永曰若非國家敵也猶今死耳永怒殺兢甲午封叔父良爲廣陽王兄子章爲太原王章弟興爲魯王故定陶王劉祉爲城陽王外祖母黃爲湖陽君良嘗爲蕭令坐法免世祖齊武王少孤良撫循甚篤及漢兵起世祖以告良良大怒不聽既而不得已良從更始入關甚見尊寵更始敗良乃歸世祖章興皆伯昇之子旣封爲王世祖以其少貴欲以吏事就其名乃使章守平陰令興守緱氏令頃之章遷梁郡太守興遷弘農太守興求賢好

善郡中翕然朝廷每有異議之乘驛問與祉字巨伯
世祖族兄也為人謙遜為宗族所敬更始敗祉間行
詣世祖是時宗室唯祉先至上大悅賞賜車服甚厚
五月宛王劉賜將更始三子詣闕皆自為列侯封故
元氏王劉歙為泗水王歙子終為淄川王故宛王劉
賜為順侯劉順為成侯周後姬當為周承休公李通
為固始侯歙字經世世祖族父也歙從兄稷有功於
齊武王歙子終又與上少相善漢兵之剋新野終之
力也上曰使歙父子並王者所以顯報之也賜字子
琴順字平仲皆世祖族兄也更始敗賜親至武關迎
更始妻子將詣洛陽上以賜得為臣之道每嘉歎之

順與上同里少相親厚更始死順東歸世祖順素謹
厚以其事更始不失節尤重之初更始使宛主劉賜
鄧王王常西平王李通俱之國鎮撫南方通娶世祖
妹即寧平公主也世祖即位徵通為光祿勳上每征
四方嘗留通守京師撫百姓治宮室六月戊戌立皇
后郭氏皇子彊為皇太子大赦天下增卿謁者秩各
一等郭氏真定人也父昌孝謹真定恭王以女妻昌
昌早終其妻號為郭主好禮節儉雖以王女之富手
常執作有女曰聖通男曰況世祖自信都還納聖通
有寵生皇子彊以況為城門校尉縣蔓侯雖皇后弟
賓客輻湊而小心謹慎謙恭愈篤追贈昌為安陽思

後漢紀卷四
五
侯上數幸況第賞賜甚厚京師號況爲金穴鄧禹遣
兵上林中率諸將謁高廟收十二帝神主送洛陽掃
除園陵爲置吏卒復就穀雲陽漢中王劉嘉來歙詣
禹降嘉字孝孫世祖族兄少孤爲世祖父南頓君所
養遇之如子與齊武王俱學長安而與世祖尤相親
嘉之王漢中都南鄭衆數十萬南陽人延岑起兵武
當衆數萬人轉攻漢中圍南鄭嘉戰敗餘衆走谷口
赤眉使廖湛將十餘萬兵擊嘉嘉大敗之斬廖湛遂
至雲陽上素與嘉善常開引之來歙又勸嘉歸世祖
乃詣禹降以嘉爲千乘太守封順陽侯嘉子膺爲黃
李侯來歙字君叔南陽新野人父冲哀帝時爲諫議

大夫娶世祖姑生歙歙有才略多通慷慨有大志兄
弟五人而世祖獨親愛之漢兵起王莽使人捕諸劉
親屬得歙擊之賓客共篡出歙更始立以歙爲吏數
正諫不用謝病去歙女弟爲劉嘉妻遣人迎歙因南
就之時或勸嘉未可降宜觀天下形勢歙爲陳成敗
深曉喻之嘉乃從焉上見歙大悅拜歙爲太中大夫
秋濉陽反劉永復入濉陽吳漢蓋廷帥諸將圍之九
月赤眉復入長安鄧禹連戰輒爲赤眉所敗三輔飢
民人相食諸有部曲者皆堅壁清野赤眉虜掠少所
得上復詔鄧禹令勒兵堅守慎無與窮寇交鋒老賊
疲弊必當束手事吾也以飽待飢以逸擊勞折捶而

管之耳自馮惜殺宗歆後禹威益損又乏糧食歸附者離散上乃遣使徵禹馮異西征上勅異曰三輔遭王莽更始之亂又遇赤眉延岑之弊兵家縱橫百姓塗炭將軍今奉辭討諸不軌兵家降者遣其渠帥皆詣京師散其小民令就農桑壞其營壁無使復聚征伐非在遠戰掠地多得城邑要在平定安集之耳吾諸將非不健鬪然多好虜掠為小民害卿本能檢吏民勉自修整無為郡縣所苦於是異據華陰以待赤眉冬太中大夫伏隆使青徐張步降因除令長多所懷服上嘉歎隆功比之酈生步求為齊王隆曰高祖與天下約非劉氏不得王步乃殺隆受劉永封焉隆

字文伯大司徒湛之子以節操聞上聞其死為之流涕十二月戊子詔曰維列侯為王莽所廢先祖魂神無所依歸朕甚閔之列侯身廢者國如故身死若子孫見在令繼其先焉河內太守寇恂坐繫治上書者免會潁川不靜復以恂為潁川太守郡中悉平封恂為雍奴侯是時賈復兵在汝南其部將殺人恂戮之復怒曰吾與寇恂並立而為其所陷大丈夫豈有侵辱而不決之者乎今與相見欲手劒擊之恂謀好避之終崇曰請以劒從有變足以相當恂曰不然昔蘭相如不畏秦王而屈於廉頗者為國也區區之趙尚有此義士吾安可以忘之乎乃勅縣盛供具執金吾

軍入界者一人皆二人待之恂既迎復道稱病而還復欲追擊恂而吏士皆醉復遂去上徵恂恂至引入時復在前欲起上曰天下未定兩虎安得私鬪詔令並坐極歡遂共車出結友而去更拜恂為汝南太守郡中無事乃修鄉校能為左氏春秋者親與學焉是歲鄧王王常將妻子詣洛陽世祖曰每念往時艱難何日忘之莫往莫來豈違平生之言哉常頓首曰臣蒙天命遭值陛下始遇宜秋後會昆陽幸賴威靈輒成斷金雖踈賤遠不敢自疑伏願陛下聖王知臣本心上會百官指常曰此人率勵諸將輔翼漢家心如金石真漢忠臣也拜常為漢忠將軍封山桑侯大

司空王梁免初梁與諸將擊檀鄉詔令兵事一屬大司馬吳漢而梁獨發野王兵上以梁不奉詔詔梁留在所縣梁以便宜進兵上大怒遣尚書宋廣持節收斬梁廣檻車執梁詣京師既至赦之以為中郎將赤眉去長安東掠郡縣也

三年春正月立親廟于洛陽即日拜馮異征西大將軍鄧禹既被徵與車騎將軍鄧弘還至華陰欲進兵擊赤眉馮異曰赤眉衆多可以恩信傾難用兵力破也上令諸將屯澠池要其東異相連綴擊其西上自待其會可一舉取之萬全之計也禹弘自以西征又被徵當還欲一戰決之遂戰移日禹軍大敗馮異將

兵救之不勝棄軍走與麾下數人歸營復收散卒堅壁會赤眉飢困乃謀擊之大破之降者八萬餘人十餘萬東走宜陽璽書勞異曰垂翅回谿奮翼澠池失之東隅收之桑榆是時延岑據藍田兵力最強上嘗璽書慰之其餘豪傑往往屯聚多者萬人少者數千人轉相攻擊百姓飢餓黃金一斤五斗穀數異轉關而屯上林中道路不通委輸未至軍士皆以果實爲糧延岑率豪傑攻異異擊大破之岑連戰不利支黨皆叛遂自武關走南陽豪傑以異破赤眉走延岑皆遣使請降異威震關中乃修園陵建官府理枉直禁盜賊數年之間上林成都是月陝人蘇況反殺弘農

太守上夜召景丹以檄示之曰弘農太守無任爲賊所害今聞赤眉從西方來恐蘇況舉郡以迎之弘農迫近京師今將軍雖疾病但卧而鎮之耳即拜丹爲弘農太守將其所領西至郡十餘日丹薨閏月己亥上幸宜陽令司馬在前中書次之驍騎元戎分陣左右赤眉震怖遣劉恭請降盆子與徐宣等二十餘人肉祖奉所得更始璽綬積兵甲宜陽西與熊耳山等世祖陳兵臨洛水中盆子徐宣以次列於前世祖曰卿等得無悔降邪宣曰臣等出長安東門君臣議計歸命聖德百姓可與樂成難與圖始故不告衆耳今日得降猶去虎口而歸慈母誠歡誠喜無所恨也世

後漢紀卷四
九
祖曰卿所謂鐵中錚錚庸中佼佼者也乃皆赦之與
妻子居洛陽各賜宅一區田二頃其後樊崇謀反誅
楊歆在長安時遇廣陽王良有恩賜爵關內侯與徐
宣俱歸鄉里以壽終式侯恭爲更始報殺謝祿自繫
獄上赦之世祖憐盆子賞賜甚厚以爲趙王郎中病
失明賜滎陽官地以爲列肆使食其稅鄧禹至宜陽
上大司徒梁侯印綬有詔還梁侯印綬以爲右將軍
彭寵圍薊耿況遣兵救之使人招況況輒斬其使二
月己未告祠高廟受傳國璽賜天下長子爲父後者
爵人二級中軍將軍杜茂爲驃騎大將軍茂字諸公
南陽冠軍人隨世祖征伐數有戰功三月尚書伏湛

爲司徒湛字惠公琅邪東武人王莽時爲繡衣執法
遷後隊正更始立爲平原太守遭倉卒世莫不驚擾
而湛獨晏然教授如故謂妻子曰一穀不昇國君徹
膳今人皆飢奈何獨飽乃以俸祿分賑鄉里來客者
百餘家時郡中不安湛移書屬縣不得相侵凌天生
蒸民爲立君非久亂也且養老育幼以待真主門下
督素有氣力欲起兵湛曰孔子誅少正卯爲其惑衆
也即誅督以示百姓於是吏民信嚮遠近獨完湛之
力也吳漢圍廣樂周建將十餘萬人救之漢逆戰不
利墮馬傷膝建等遂得入城諸將謂漢口大敵在前
而公卧衆懼矣乃裹瘡而起椎牛饗士曰賊兵雖多

乃劫掠群盜耳勝不相讓敗不相救非有伏節死義同心者也封侯之秋諸將勉之吏士聞之莫不激怒明日賊兵大出圍營數重漢乃被甲仗戟曰聞雷鼓聲皆大呼俱進後至者斬遂鼓而進之賊兵大破廣樂降蘇茂周建走胡陵復圍睢陽是時秦豐據黎丘延岑據武鄉董訢據堵鄉鄧奉據新野荆楚尤亂上方圖之以岑彭爲征南大將軍與耿弇賈復朱祐王常等并力征討先圍董訢鄧奉將萬人救訢訢奉兵甚精諸將連戰不利奉乘勝生執朱祐上聞之大怒夏四月上自南征至葉訢奉將兵遮道不得前上謂岑彭曰此將軍之任也彭乃奮擊破之董訢鄧奉走

育陽因朱祐請上以奉舊功臣意欲赦之耿弇曰奉背恩反逆暴師連年陛下旣至親在行陣兵敗乃降不誅奉無以懲惡於是誅奉上以朱祐見獲厚加賞賜使復其位耿弇破延岑岑亡入蜀五月乙卯晦日有蝕之大赦天下劉永將慶吾斬永降封吾爲列侯蘇茂周建立永子紆爲梁王保垂惠冬十二月上幸春陵祠園廟大置酒與春陵父老故人爲樂遣岑彭傳俊臧宮擊秦豐秦豐拒漢軍於鄧彭等數月不得進上數以讓彭乃令軍中曰明旦軍會和成陰逸因豐聞之悉引軍西邀彭彭乃直襲黎丘黎丘震駭豐遽歸救之彭逆擊大破之遂圍黎丘乃封彭爲舞陰

侯初汝南人田戎起兵南郡衆數萬人屯夷陵謀將降漢戎妻兄辛臣反覆人也乃圖彭寵張步董憲劉永李憲公孫述隗囂劉芳所得郡國云洛陽所得地如掌耳且案兵觀形勢何遽降戎曰吾衆不如秦豐豐猶爲征南所圍而況吾乎降決矣乃順江入沔將降岑彭使辛臣與長史留守臣盜戎珍寶及善馬從陸道晨夜詣彭曰謹說戎降戎在後方到因從彭營與戎書曰岑將軍已奏我封五千戶侯虚心相待願急來無拘前圖戎令臣留守而先至封侯旣以疑之矣又長史檄至知臣盜寶物善馬猶是益猜復反彭擊戎破之還屯夷陵隗囂遣使詣闕上甚悅素聞

其聲虚心相待每報答之常手書稱字是歲彭寵自立爲燕王李憲自稱天子

四年春正月甲申大赦天下耿況耿舒取軍都彭寵之邑也於是更封況爲隃靡侯舒爲牟平侯祭遵耿弇擊張豐豐功曹執豐降初豐好方士方士言豐當作天子囊盛石擊豐肘云石中當出玉璽豐信之故反豐臨當誅遵掾爲破其石豐乃歎曰死亡所恨上使耿弇拒彭寵弇上疏曰大兵未會臣不能獨進且臣家屬皆在上谷京師無骨肉之親願得還洛陽上報曰將軍出身爲國功效尤著何嫌何疑而求徵乎其勉思方略以成功業耿況聞弇求徵乃遣少子國

入侍上以爲黃門侍郎初上訪博通之士於司空宋弘弘薦沛國人桓譚以爲才學博聞幾及劉向揚雄召拜議郎給事中上令譚鼓琴奏其繁聲乃得侍宴弘聞之大恨伺譚出時正朝服坐府上遣召譚譚到不與席讓之曰吾所以薦子者欲令輔國以道德也而今數進鄭聲亂雅頌非中正者也能自改耶不然正罪法譚頓首辭謝良久乃遣之後召羣臣會樂上使譚見弘失其度上怪而問之弘乃離席上免冠謝曰譚臣所薦達不能以忠導主而令朝廷悅鄭聲臣前召以責之臣之罪也上謝弘使譚反其服後遂不復令給事中是時天下草創政治未立譚旣見退上

疏言時宜曰國之廢興在於政事得失在於輔佐輔佐賢明則俊士充朝而治世合務輔佐不明則論時失宜而舉多過事秉國之君俱欲興化建善而治殊事異者所謂賢者異也蓋善者視俗而施教察失而爲防威德更興文武迭用然後政調於時而躁民可定也昔董仲舒言治國譬若張琴焉小不調者可因而就和也及至大差謬則解而更張之夫更張難行而拂衆者亡是故賈誼以才逐晁錯以智死雖有殊能而莫敢談懼於前事也且設法禁者非能盡天下之姦又皆合衆人之所欲大抵取便國利事則可矣書奏不省是時天子方篤於讖而譚雅不善之又以

功賞薄故令天下不時定復上疏曰臣前獻策未有
詔報不勝憤懣復言其過蓋天道性命聖人難言也
自子貢等不得而聞況後世淺儒能通之乎或收古
之圖書增益造飾稱孔子並為識記以誑誤人主可
不抑遠之哉臣聞安平則尊道術之士有難則貴介
胄之臣今聖朝以興復祖統為民臣主而四方尚有
未盡降歸者此權謀未得也臣譚伏觀陛下之用人
其說士則無異略奇謀若酈生隨何者將帥則無勇
智習兵若韓信吳起者其降下無大恩重賞以誘其
後至或虜奪財物使徵又狐疑連歲月而不解古人
有言皆知取之而取莫知與之而取陛下若能輕爵

祿與士大夫共之而勿愛惜則何招而不至何說而
不釋何向而不開何征而不剋如此則能以狹為廣
以遲為速亡者復得矣由此上逾不悅譚字君山有
雋才博覽無所不見不為章句訓誥皆通其大義數
從劉歆楊雄稽疑論議至其有所得歆雄不能間也
好音樂鼓琴性簡易不修廉隅頗以此失名譽嘗疾
俗儒高談弘論不切時務由此見排擯哀平間位不
過郎然王侯貴人皆願與之交王莽居攝篡弒之間
天下諸儒莫不競褒稱德美作符命以求容媚譚獨
嘿然無言官止樂大夫
袁宏曰相譚以踈賤之質屢干人主之情不亦難乎

嘗試言之夫天下之所難於干人主之心一曰性有
逆順二曰慮有異同三曰情有好惡四曰事有隱顯
五曰用有屈伸六曰謀有內外七曰智有長短八曰
意有興廢夫順之則喜逆之則怒同之則欣異之則
駭好之則親惡之則踈過之欲隱善之欲顯屈者多
耻伸者多怒語伏在內志散在外所長必矜所短必
去愛之欲興憎之欲廢此皆人君非必天下之正也
人臣所以干人君者必天下之正也然而八者之間
禍福不同可不察也夫一人行之萬人議之雖人君
之所資亦人君之所惡也百姓有心一人制之雖百
姓之所賴亦百姓之所畏而干人君之所惡求其心

入天下所難地也縱不致患於其胷中國未能帖然
也故有道之君知所處之地萬物之所不敢干也故
柔情虛已布其腹心引而盡之常恐不至而況抑而
劾之使其自絕哉自三代已前君臣穆然唱和無間
故可以觀矣五霸秦漢其道參差君臣之際使人瞿
然有志之士所以苦心斟酌量時君之所能迎其悅
情不干其心者將以集事成功大庇生民也雖可以
濟一時之務去夫高尚之道豈不遠哉夏四月吳漢
擊五校賊追之至東郡平原又破之鬲縣五姓反逐
其守長諸將曰朝擊鬲暮可拔也漢怒曰敢至鬲下
者斬使鬲反者守長罪移檄告郡牧守長欲斬之諸

將皆竊言不擊五姓反欲斬守長乎漢乃使人謂五姓曰守長無狀復取五姓財物與寇掠無異今已收擊斬之矣五姓大喜相率而降諸將曰不戰下人之城非衆所及也嘗有寇夜攻漢軍中驚擾漢堅卧不動軍中聞漢不動皆還按部漢乃選精兵夜擊大破之是時泰山豪傑與張步連兵漢言於上曰非陳俊莫能安泰山也於是以俊爲泰山太守行大將軍事步聞之遣兵迎俊於嬴下俊擊大破之因攻下諸縣遂定泰山五月上幸盧奴初上將征彭寵過盧奴而還諸將問吳漢曰敵未破而上還何也漢曰陛下曉兵還必不虛上告諸將曰狡賊出魏郡在人後故還

也六月上幸譙王霸馬武攻垂惠蘇茂將兵救之馬武與戰不利從霸求救霸閉營不出軍吏爭之霸曰賊兵精銳其衆又多吾吏士心恐而武軍挫退此敗道也今堅閉示不相救武軍困急其戰自倍賊衆疲勞吾以精兵乘其弊乃可剋也賊果大出合戰良久霸出精騎擊其後賊皆破走茂復求戰吏士皆曰賊前已破今易擊也霸曰不然蘇茂遠來相救糧食不足以久留故挑戰冀得一切之勝耳今閉營休士而勝可全所謂不戰而誦人兵善之善者也遂閉門堅守勞賜吏士城中數出挑霸霸不動茂果引兵去秋八月上幸壽春馬武劉隆圍李憲於舒彭寵圍薊朱

浮不能守單馬奔京師尚書令侯霸奏浮構成寵罪
敗亂幽州不能伏節死難與寵相拒罪當誅上赦之
冬十月上幸宛朱祐耿植圍秦豐岑彭傳俊擊田戎
於夷陵戎破走上蜀彭遣積弩將軍傅俊至江南偏
將軍房充至交州班行詔書陳國家威德於是交州
牧鄧讓蒼梧太守杜稷交趾太守楊光更始所用也
皆上書貢獻江南郡縣亦信使通焉十二月上幸黎
丘詔秦豐出惡言朱祐等急攻之豐將妻子降祐輜
車送洛陽大司馬吳漢劾祐曰秦豐狡猾連年固守
陛下親踰山川遠至黎丘開日月之信而豐悖逆天
下所聞當伏誅滅以謝百姓祐不即斬截以示四方

而廢詔命聽受豐降無將帥之任大不敬上誅豐不
罪祐是冬馬援爲隗囂使來援字文淵茂陵人長兄
況最知名爲河南太守封窮虜侯況兄余中壘校尉
封致符子次兄真增山連率皆二千石封侯援少有
大志諸兄竒之年十餘歲平陵朱勃與援同年能說
韓詩援纔能書退有慙色況謂援曰小器速成朱敦
智能盡於今日矣後成人知謀衆事皆從汝稟受勿
畏也援以況欲獎勵已內以爲不然焉援受齊詩數
年意不能守章句乃辭況欲至邊郡畜牧況曰汝大
才當晚成良工不示人以璞且從所好治裝未辦會
況卒援行喪暮年常不離墓時朱勃以試守渭城宰

援獨言朱勃終當何時稟仰我頃之或薦援有大略由是爲曹督郵送罪人司命府援皆縱遣之因亡命北地以畜牧爲事援父嘗爲牧帥令兄貞爲護宛吏者故人賓客多從之轉安定天水隴西數郡豪傑望風而至賓客自環嘗數十人援田畜日廣羊五六千頭馬數百羣穀萬斛乃歎曰凡殖財者貴以施也不則守錢奴耳乃散以賑昆弟舊故乃還至長安王莽末盜賊起求雄傑之士援與原涉爲潁川太守援爲漢中太守適至官王莽敗貞亦亡去增山俱之梁州會隗囂翼用援爲綏德將軍而公孫述稱帝於蜀囂意未知所附乃遣援南視述素與援舊以到當握手

相迎也乃盛陳陛戟見援語言未悉延援就客館述備威儀會百官爲援立舊交之位述罄折而入鸞旌旄騎警蹕車盛噐服賓客甚盛欲留援援曰天下雌雄未定公孫不吐哺走迎國士與圖成敗乃修飾邊幅如偶人形此何足久留乎數月辭去還謂囂曰子陽若井底蛙妄自尊耳不如專意東方於是遣援與拒蜀侯國遊先俱奉章詣京師初到召詣尚書有頃中黃門一人引入時在宣德殿援拜上大笑曰卿遨遊二帝間見卿大慙援頓首辭謝因曰當今之世不但君擇臣臣亦擇君臣與公孫述同縣少有娛臣前至蜀陛戟乃見臣臣遠異方來陛下何以知臣非刺

客姦人而簡易若是上復大笑曰卿非刺客顧說客耳援對曰天下傾覆盜賊自立名姓者不可勝數今得見陛下寥廓大度同符高祖乃知帝王自有真也上壯之使從征伐每召見讌語夜至天明援才略兼人又好縱橫之畫故未得官待詔而已上遣太中大夫來歙持節送援國遊先至長安怨家殺遊先其弟為囂雲旗將軍來歙恐其怨恨即與援俱還長安

後漢光武皇帝紀卷第四

後漢光武皇帝紀卷第五

袁宏

袁宏

五年春二月丙午大赦天下周建兄子誦以垂惠降劉紆周建蘇茂走下丕建道死封孔子後孔安為殷紹嘉公初彭寵徵書至潞縣有火災城中飛出城外燔千餘家殺人甚多寵堂上聞蝦蟇聲在爐火下鑿地求之無所得數有變惟卜筮及望氣者皆言兵當從中起寵以其從弟子后蘭卿本上府所使來故不相親也今將屯於外寵奴子密等三人謀共劫寵寵齋於便室晝卧三奴共縛著牀告外吏大王解齋吏皆休旦乃白事乃從次呼諸奴婢以寵教責問便收縛各置空室中以寵聲呼其妻妻入室見寵縛驚曰

後漢書卷五
奴反邪奴格妻頭擊頰寵曰趣爲諸將軍辦裝兩奴將妻入取物一奴守寵寵謂守奴曰若小兒我素所愛也爲子密逼劫耳解我縛出閣則活矣用女珠妻汝家中財物皆以與汝奴意解之視戶外見子密聽其語遂不解子密將妻入取寵男女悉閉室中收金珠衣物至寵所裝之被馬六匹使妻縫縑囊昏夜後解寵手令作記告城門將軍令遣子密等至子后蘭卿所開城門出勿稽留書成斷寵及妻頭置縑囊中馳詣闕封子密爲無義侯寵尚書韓立高宣等共立寵子午爲燕王子后蘭卿爲將軍數日寵國師韓利斬午首詣祭遵遵將兵誅寵支黨漁陽遂平上嘉耿

況之功以其久勞於邊使光祿大夫樊密持節徵況還京師賜以大第甚見尊重況年老多病天子親數臨問徵弇視疾弇舒並封列侯國爲射聲校尉復除二子廣舉爲郎諸子侍疾並垂青紫當世以爲榮及薨贈賜甚厚謚曰列侯子國以當嗣辭曰先侯愛少子霸上疏讓天子許焉國有籌策數言邊事天子器之官至大司農三月徙廣陽王良爲趙王山陽人龐萌爲更始冀州牧與世祖謝躬俱平邯鄲萌謂躬曰劉公不可信也躬以告世祖世祖喻而安之及上誅謝躬而萌率衆降上奪其衆謂萌曰前在邯鄲知之何速邪萌曰知之久矣萌爲人婉順上親愛之以爲

侍中嘗對諸將曰可以託六尺之孤寄百里之命龐
萌是矣使萌爲平狄將軍與蓋延俱定梁楚地萌與
延爭權懼延譖已遂勒兵反夏四月平狄將軍龐萌
反襲蓋延破楚相孫萌自號東平王引兵與董憲蘇
茂合上嗟歎曰人不可知乃如是下詔曰吾嘗於衆
人中言萌可爲社稷臣將軍等得無笑吾言老賊當
族其勵兵馬會睢陽六月上幸蒙龐萌董憲蘇茂等
將三萬人攻挑城挑城告急上將輕騎二千步兵數
萬晨夜至亢父百官疲倦可且宿上不聽復行十里
宿任城明旦諸將欲攻賊賊亦勒兵待戰上令諸將
不得出是時吳漢兵在東郡馳使召之萌等驚曰數

百里晨夜行以爲到當戰而堅坐任城致人城下貞
不可往也積二十餘日吳漢到乃進擊大破之萌憲
茂復將數萬人屯昌慮以兵拒新陽吳漢進擊破之
遂守昌慮是時河西隔遠世祖都洛陽未能自通以
隗囂稱漢年號竇融等從受正朔囂外受民望內圖
異計遣說客張玄游說西河言一姓不再興今豪傑
競逐雌雄未分宜與隴蜀合從高爲六國之勢下成
尉他之事融乃聚其衆而議之曰漢承堯運曆數延
長上之姓號其見於天文自前博物道術之士言之
久矣故劉子駿改易名字以應其占此皆近事暴著
所共見也以人事言之今稱天子者數人而洛陽甲

兵最強號令最明加以祖宗之重百姓所歸服天人
之應如此他姓未能爭也衆皆以爲然梁統恐衆惑
其言乃刺殺玄是夏竇融及五郡太守遣使詣闕上
先聞五郡全實在隗囂公孫述之間常欲招引之會
得其表甚悅遣使拜融爲涼州牧璽書褒納之秋八
月吳漢破昌慮軍士高扈斬梁王紆降蘇茂奔張步
董憲龐萌走之朐漢復守之冬十月上幸魯使大司
空祠孔子使耿弇諸將擊張步步盛兵祝阿列營鍾
城弇攻祝阿拔之開其角令奔鍾城皆空壁走將軍
費敢以精兵守巨里弇令軍中益治攻具將攻巨里
步濟南王費邑聞之將兵救巨里弇告諸將曰此即

所求者野兵不擊何以城爲所以治攻具者所以誘
致邑耳弇分兵守巨野自與邑戰大破之弇乃收所
斬級以歸示巨里城中城中恟懼夜空城走弇收其
積聚縱兵擊諸未下者平三十餘營時張步都劇使
弟藍將兵守西安西安距臨淄三十里弇引營居臨
淄西安之間西安城小而兵精臨淄名大而不實弇
令軍中曰後五日攻西安藍聞之晨夜爲守備至其
夜半令軍皆食會明至臨淄城軍吏爭之以爲攻臨
淄而西安必救攻西安臨淄不能救弇曰然吾故攻
西安今自憂城守而吾攻臨淄一日必拔何救之有
吾得臨淄則西安孤藍與劇斷絕必復亡去所謂擊

一而得兩者也且西安城堅兵精攻之未可卒下衆必多死傷正使得其城張藍引兵奔臨淄如是臨淄更強勒兵憑城觀人虛實吾深入敵境後無轉輸旬日之間不戰而困諸君適不見是耳奔遂攻臨淄拔之張藍聞臨淄拔果將其衆走劇去臨淄九十里奔令軍中無得掠劇下須步至臨淄乃擊之步聞奔言大笑曰以尤來大彤十餘萬衆吾皆破之今大兵少於彼又皆疲勞何足破乎奔上書曰臣據臨淄深塹壘張步必自來攻臣以逸待勞以實擊虛旬日之間步首自可獲上然其計步果與三弟故大彤帥董異將二十萬衆至臨淄奔令都尉劉歆太山太守陳俊

勒兵城上分四城下賊至北門歆俊兵皆反步等乘虛並入攻奔營奔登臺望之見其營擾乃下臺安之旣而將精兵擊步於東下大破之飛矢中奔股引刀截之軍中無知者奔欲以疲步兵明日將戰陳俊曰步兵多且可須上至奔曰上至臣子當擊牛醢酒以待百官反欲以賊遺君父邪遂縱兵合戰復大破之奔度步已困乃罷兵置左右翼步夜果引去伏兵夾擊死者城中溝漸皆滿得輜重二千餘兩奔縱兵追擊至鉅昧水上八十餘里僵尸相屬後數日上至臨淄勞軍百官列坐上謂奔曰將軍正韓信也韓信擊歷下以著名今將軍攻祝阿以發迹此非齊西界邪

後漢書卷五
五
弁曰歷下即歷城在祝阿東五十里皆齊西界也上
曰將軍嘗爲吾言困上谷兵以擊涿郡漁陽進擊富
平獲索因東攻張步平齊地以爲落落難合今皆如
將軍策有其志者事竟成也將軍有定齊之功功出
於大司馬明如日月也張步既破走還劇而蘇茂適
至讓步曰我南陽兵精不可待茂邪步曰負卿何言
兄弟走平壽上曰能相斬降者封之步乃斬蘇茂肉
袒軍門降弁勒兵入城樹十二郡旗各以本郡詣旗
下衆尚十餘萬輜重七千餘兩封步爲安丘侯於是
琅邪未平徙陳俊爲琅邪太守齊地素聞俊名始入
界盜賊大散頃之張步兄弟謀反亡歸琅邪俊擒討

盡誅之上美其功賜俊璽書曰將軍元勲大著威振
青徐兩州有警實得征之俊撫貧弱悉有義令行郡
中百姓歌之數上書自請擊隴蜀上報曰東州新平
大將軍之功也負海猾夏盜賊之處國家以爲重憂
且勉鎮撫之初起太學官十二月盧芳自稱天子入
居九原畧有數郡初上問來歙曰今西州未附子陽
稱帝吾方務靜關東西畧未知所任計將何如歙因
自請曰臣嘗與隗囂相遇關中其人始建爲漢之計
今陛下聖德隆興臣願得奉一節開以丹青之信囂
必歸命則公孫自亡勢不足圖也上然之使歙持節
喻指往來數年矣於是歙復與馬援使喻隗囂囂與

馬援卧起問京師善惡援荅曰前到京師凡數十見
每待對夜至天明援事主未常見也材德驚人勇又
非人敵開心見誠好醜無所隱圖畫天下事良備量
敵決勝濶達多大略與高帝等經學博覽政事文辯
未覩其比也囂曰必如卿言勝高帝邪援曰不如也
高帝大度無可無不可今上好吏事動循軌度又不
飲酒所不如也囂大笑曰若是反不勝邪囂雖內不
信不得已遣太子恂入侍拜為胡騎校尉封鐫羗侯
援亦將家至京師上書求將賓客屯田上林中因宣
揚國威招來豪傑以立尺寸之功上許焉是冬大司
徒伏湛免尚書令漢霸為司徒霸字君房河南密人

也矜嚴有威容家累千金不事產業篤志詩書成哀
間仕為郎王莽時歷職有稱為臨淮太守莽敗霸保
郡自守吏民安之更始初遣謁者徵霸百姓老弱相
攜啼泣遮使者車或當道卧皆曰願乞復留霸等暮
年民至戒乳婦勿舉子侯君當去俱不能全耳謁者
恐霸就徵失亡臨淮於是不敢受璽書具以狀聞會
更始敗世祖即位徵霸為尚書令是時朝廷新立制
度草創政令有不便於民者霸輒奏省之霸辟太原
人閔仲叔既至霸勞問之不及政事叔對曰始得明
公辟且喜且懼何者喜於為明公所知懼於虛薄不
能宣益拾遺今未越府閩喜懼纔半親知政教已見

掾吏及見明公喜懼皆去何則望明公問屬何以明
政美俗調陰陽訓五品令宇內人安也以叔爲不足
問邪不當辟也如以爲任用而不使陳之則爲失人
智者不私人以位亦不失人是以喜懼皆去因自劾
去後博士徵不至終於家太子少傅王丹被徵將至
侯霸遣子昱迎拜之丹下車荅拜昱曰家公欲與公
俱定恩分何爲拜子孫邪丹曰君房有是言丹未許
也丹常受人言有所薦及舉者有罪丹坐免官終不
言客甚慙自絕於丹丹俄爲太子太傅使人呼客見
之何遇丹之薄也客自安如故其子有同門生遭親
喪白丹欲奔之丹撻之五十或問其故丹曰世稱鮑

叔管夷吾次則百里奚蹇叔近則王陽貢禹歷載彌
久如此其難也張陳凶其終蕭朱隙其末故勅子孫
友道難立非保慎不惑焉能終乎丹字仲回京兆下
邽人王莽時連徵不至避世隴西隱居養志家累千
金好施周急每歲時農畢察強力多收者載酒肴而
勞之其惰懶不收者耻不獲勞無不力田者聚落化
之遂以殷富閭里犯罪者喻其父兄而致之法喪憂
者量其資財爲之制度丹親任其事行之十年民皆
敦厚陳遵者豪傑之士也遵友人喪親賻縑百匹丹
獨送縑一匹曰如丹是縑皆出機杼也遵有慙色欲
與丹相結丹未之許也更始時遵北使匈奴過辭於

丹丹謂遵曰俱遭亂世唯我二人爲天地所遺今子使絕域無以相贈贈子以不拜其高抗不屈皆此類也衛尉鈔期執金吾寇恂亦慕而友之名重當世頃之遜位卒于家是歲徵會稽嚴光太原周黨光字子陵少與世祖同學世祖即位下詔徵光光變名姓漁釣川澤至是復以禮求光光不得已舁疾詣京師上就見光曰子陵不可相助邪光卧而應曰士固有執節者何至相逼乎天子欲以爲三公光稱病而退不可得而爵也黨字伯況舉動必以禮赤眉之亂所在殘破至太原聞黨德行不入其邑由是名重天下三徵然後至黨着短布單衣穀皮綃頭見於尚書欲令

黨改冠服黨曰朝廷本以是故徵之安可復更邪遂見自陳願守所志上聽之詔曰許由不仕有唐帝德不衰夷齊不食周粟王道不虧不忍使黨久逡巡于汙君之朝其賜帛四十匹遣歸田里博士范升奏毀黨曰臣聞堯不須許由巢父而天下治周不待伯夷叔齊而王道成巍巍蕩蕩至今不絕臣伏見太原周黨使者三聘乃肯就車陛下親見詣庭黨伏而不謁偃蹇自高逡巡求退釣采華名以誇主上臣愚以爲黨等不達政事未足進用臣願與黨並論雲臺之上考試圖國之道不如臣言請伏虛誣之罪書奏天子示公卿詔曰自古堯有許由巢父周有伯夷叔齊自

疾高祖有南山四皓自古聖王皆有異士非獨今也
伯夷叔齊不食周粟太原周黨不食朕祿亦各有志
焉黨既退著書上下篇終於沔池百姓賢而祠之是
時太原王霸北海逢萌亦隱居養俱被聘霸到尚書
拜不稱臣問其故荅曰天子有所不臣諸侯有所不
友遂以疾歸茅屋蓬戶不厭其樂萌少給事亭長慨
然歎曰大丈夫焉能爲人役哉遂去就師聞王莽居
攝子宇諫莽殺之萌會友人曰三綱絕矣禍將及人
即解衣冠挂東都城門將家屬客於遼東天下定乃
還琅邪不其山中以德讓導鄰里聚落化之詔書徵
萌上道迷不知東西萌曰朝廷所以徵我者以吾聰

明睿智有益於政耳今方面尚不知安能濟政即歸
後連徵不起

袁宏曰夫金剛水柔性之別也員行方止器之異也
故善御性者不違金水之質善爲器者不易方員之
用物誠有之人亦宜然故肆然獨往不可襲以章服
者山林之性也鞠躬履方可屈而爲用者廟堂之材
也是以先王順而通之使各得其性故有內外隱顯
之道爲末世凌遲治亂多端隱者之作其流衆矣或
利競滋興靜以鎮世或時難迍邐處以全身或性不
和物退以圖安或情不能嘿卷以避禍亂凡之徒有
爲而然非真性也而有道之君皆禮而崇之所以抑

進取而止躁競也嗚呼世俗之賓方抵掌而擊之以爲譏笑豈不哀哉自王莽末天下旱蝗稼穀不成至建武之初一石粟直黃金一斤而人相食二年秋野穀旅生野蠶成繭民收其實以爲衣糧是歲野穀生漸少南畝益墾矣

六年春正月丙辰改春陵爲章陵復比豐沛劉隆等破舒城斬李憲二月吳漢拔朐城董憲龐萌逃出漢執其妻子憲流涕謝吏士曰妻子皆已得矣又苦諸公將十餘騎欲從間道詣上降追兵至皆斬之於是天下粗定唯隴蜀未平上乃休諸將於洛陽分軍士於河內數置酒會諸將輒加賞賜每幸郡國見父老

掾吏問數十年事吏民皆驚喜令自以見識各盡力命焉初軍旅間賊檄日以百數上猶以餘暇講誦經書自河圖洛書讖記之文無不畢覽王元說隗囂曰天下成敗未可知天水完富士馬最強宜北取西河東收關中按秦舊迹表裏河山元請以一九泥爲大王東封函谷關此萬世之一時也旣不能爲此且畜養士馬據隘自守曠日持久以待四方之變圖王不成其弊猶足以霸要之魚不可以脫於泉一失權柄神龍還與螾同前更始都長安四方嚮應以爲真定也一朝壞敗大王幾無所據今南有公孫北有文伯江湖海濱王公十數而欲信儒生之語棄千乘之基

羈旅危國以求安全是由覆車之軌計之不可者也
囂心然之是時公孫述遣兵出江關敗南郡上因欲
天水伐蜀從褒斜江關路遠而多阻莫若從西州因
便以舉則兵強財富囂雖遣子入侍而心懷兩端常
思王元之言欲據一方不欲早定乃復上書盛言蜀
道危險棧閣敗絕丈尺之地則不得通述性嚴酷上
下相患須其罪惡孰著大呼嚮應之勢也來歙素剛
聞囂有異議遂發憤責囂曰國家以君爲知臧否曉
廢興故爲手書以暢聖意旣遣伯春復用邪惑之言
族滅之計叛主負子背忠信傷仁義吉凶之決在於
今日欲前刺囂而左右兵多囂欲害歙歙持節就車

囂逾怒欲殺歙王遵諫曰愚聞爲國者慎名與器爲
家者畏怨重禍名器俱慎則下伏其令怨禍不輕即
家受其福今將軍遣子質漢而外懷他心名器逆矣
旣違其命又殺其使輕怨禍矣古者列國兵交不絕
其使所以重兵貴和而不任戰也春秋傳曰交兵使
通可也何況持王命質而犯之哉上不合於正義內
不周於長利苟行盜賊之短策又何是非之能識加
以伯春委身已在闕庭而屠漢使此踐機試劔授刃
於頸也君叔雖單居陛下之外兄也屠之未損於漢
而隨以族敗昔宋執楚使遂有易子之禍小國猶不
可辱況萬乘之主乎歙知黨多在西州救助非一遂

得免王遵亦豪傑士也既而降漢封上雒侯初囂問班彪曰往者周二戰國並爭天下分裂數世然後始定意者縱橫之事復起於今日乎將承運迭興在一人也願先生論之對曰周之興廢與漢不同周立爵五等諸侯從政本根既微枝葉強大故其末流有縱橫之事其勢然也漢家乘秦之制郡縣治民臣無百年之柄至成帝假借外家哀平短祚國嗣三絕危自上起傷不及下故王氏之貴傾擅朝廷能竊號位而不根於民是以即真之後天下莫不引領而思漢十餘年間天下中外騷擾遠近俱發假號雲合咸稱劉氏不謀而同辭方今雄傑跨州城者皆無七國世業

之資詩云皇矣上帝臨下有赫監視四方求民之瘼今民謳吟思漢嚮仰劉氏已可知矣囂曰先生言周漢之勢可也至於但見愚民習識劉氏姓號之故而謂漢家復興踈矣昔秦失其鹿劉季逐而得之時民復知漢乎彪既感囂言又愍狂狡之不息廼著王命論以救時難曰昔在帝堯之禪曰咨爾舜天之歷數在爾躬舜亦以命禹洎于稷契咸佐唐堯光濟四海奕世載德至於湯武而有天下雖遭遇異時而禪代不同至於應天順民其揆一也故劉氏承堯之祚氏族之世著乎春秋唐據火德而漢紹之始起沛澤則神母夜號以彰赤帝之符由是言之帝王之祚必有

明聖顯懿之德豐功厚利積累之業然後精誠通乎神明流澤加乎生民故能爲鬼神所福嚮天下所歸往未見運世無本功德不紀而得偪起在此位者也世俗見高祖興於布衣不達其故以爲適遭暴亂得奮其劍遊說之士至比天下於逐鹿捷者幸而得之不知神器有命不可以智力求悲夫世亂所以多亂臣賊子者也若然者豈獨闇於天道哉又不覩之於人事矣夫饑饉流離單寒道路思有短褐之襲擔石之蓄所願不過一金然終不免轉死溝壑何則貧窮亦有命也況乎天子之貴四海之富神明之祚可得而妄處哉故遭罹厄會竊其權柄勇如信布強如梁

籍成如王莽然卒潤其湯鑊伏質烹俎分裂又況么麼不及數子而欲晻姦天位者乎是故駑蹇之乘不騁千里之路鷲雀之儔不奮六翮之用案椀之材不荷棟梁之任斗筭之子不秉帝王之重易曰鼎折足復公餗言不勝其任也當秦之末豪傑共推陳嬰而王之其母止之曰自吾爲子家婦而世貧賤今卒富貴不祥不如以兵屬人事成少受其利不成禍有所歸嬰從其言而陳氏以寧王陵之母亦見項氏之必亡劉氏之將興也是時陵爲漢將而母獲於楚有漢使來陵母見之謂曰願告吾子漢王長者必得天下子謹事之無有二心遂對漢使伏劍以國勉陵其後

果定於漢陵爲宰相封侯夫以匹婦之明猶能推事理之致探禍福之機全宗祀於無窮垂冊書於春秋而況大丈夫之事乎是故窮達有命吉凶由人嬰母知廢陵母知興審此二者帝王之分決矣蓋在高祖其興也有五一曰帝堯之苗裔二曰體貌多奇異三曰神武有徵應四曰寬明而仁恕五曰知人善任使加以信誠好謀達於聽受見善如不及用人如由已從諫如順流趨時如響起當食吐哺納子房之策濯足揮洗揖酈生之說悟成卒之言斷懷土之情高四皓之名割肌膚之愛舉韓信於行陣收陳平於亡命英雄陳力羣策畢舉此高祖之大畧所以成帝業也

若乃靈瑞符應又可畧聞矣初劉媪妊高祖而夢與神遇震電晦暝有龍蛇之恠及長而多靈有異於衆是以王武感物而折契呂公觀形而進女秦始皇東遊以厭其氣呂后望雲而知其所處始受命則白蛇分西入關則五星聚故淮陰留侯謂之天受非人力歷古今之得失驗行事之成敗稽帝王之世運考五者之所謂趣舍不厭斯位符應不同斯度而苟昧權利越次妄據外不量力內不知命必喪保家之主失天年之壽遇折足之凶伏斧鉞之誅英雄誠知其覺寤畏若禍戒超然遠覽淵然深識收陵嬰之明分絕信布之覬覦拒逐鹿之瞽說審神器之有授無貪不

可幾爲二母之所笑則福祚流於子孫天祿永終矣
囂不寤慮乃轉之河西大將軍竇融諮訪焉慮字叔
皮右扶風安陵人成帝時慮姑爲婕妤諸父昆弟貴
幸當世父稚王莽時爲廣平太守莽攝政欲文致太
平使侯者分行風俗采頌聲稚無所上被劾爲延陵
園郎由是班氏不顯莽朝慮幼好學家有賜書內足
於財好古之士父黨揚子雲已下莫不造其門年二
十而天下亂因避地西州及囂將背漢竇融與書責
讓之曰將軍當厄會之際乘不利之時承事本朝委
身於國忠孝冠周霍德讓配吳札融等所以服高義
願爲役者也忿憤之間改節易圖百年累之一朝毀

之豈不惜乎殆執事者貪功建謀以至於此融竊痛
之融聞智者不危衆以舉事仁者不違義以要利初
事本朝稽首北面忠臣節也及遣百春垂涕相送慈
父恩也俄而背之謂吏士何忍而出之謂留子何自
起兵以來轉相攻擊城郭皆爲丘墟生民轉於溝壑
今其存者非鋒刃之餘則流亡之孤今傷痍之體未
愈哭泣之聲未絕幸賴天運少還而大將軍復重其
難是使瘡痍不得遂瘳幼孤復見流離庸人且爲流
涕況仁者乎惟將軍省察之囂不納融乃與五郡太
守請師期世祖嘉美之夏四月上幸長安謁園陵諸
將議欲延囂日月之期許爵其將帥以散其謀祭遵

曰囂姦計久矣今若案兵引日則其謀益深而公孫得固其姦謀不如遂進上從之遣吳漢取弁諸將從隴道擊蜀隗囂使王元據隴坻伐樹木以塞隴道諸將與戰不利還屯三輔馬援上書曰援自念事陛下本無公輔之薦左右之助臣不自陳陛下何因聞之故臣不復避瞽言昧死陳誠臣與囂往為知交今聞與來歙書深更怨臣自計無負於囂遣臣東謂臣曰僕北面稱臣加以本欲為漢足下往觀其政於汝意可即專心矣臣還報以赤心欲囂善耳非欲陷於非義也囂自挾姦心盜憎主人反欲歸怨於臣臣欲遂退不言則無以報陛下願詣行在所得露心腹陳

滅西州之術然後退就壘畝飯蔬飲水隨四民之職死無所恨上報許援東詣京師具言擊囂之計上大悅謂援曰吾方西誅隗囂待詔勉卒所志是時建威將軍耿弇屯漆征虜將軍祭遵屯汧征西將軍馮異屯上林大司馬吳漢在長安中郎將來歙堅領衆軍在安民援始將突騎五千匹諸將每疑議更請呼援咸敬重焉而來歙深與援善囂復上疏曰吏民間大兵卒至驚恐自救臣囂不能禁止兵雖有大利不敢廢臣子之節親自追還昔虞舜事父大杖則走小杖則受臣雖不敏不敢不勉今臣之在本朝如遂蒙恩更得洗心死骨不朽有司以囂慢誅其子恂上不忍

復使歛至汧賜囂書曰昔柴將軍與韓信書云陛下寬仁雖有亡叛而後歸輒復泣號不誅也故復賜書深言則似不遜畧言則事不決今若束手復遣恂弟詣闕有全爵祿之福吾年已三十餘在甲兵中十年厭浮語虛辭即不欲勿報囂知世祖籌之明乃遣使稱臣於蜀公孫述以囂爲朔寧王數遣兵助囂太原人溫序爲護羌校尉行步至襄武爲囂將苟宇所執欲生降之謂序曰并勢力天下可圖也序曰受國重任本當効死義不貪生宇復曉喻序序怒叱之曰虜何敢脅漢將左右欲殺之宇止之曰義士欲死節賜劔令自裁序受劔銜鬚歎曰旣爲賊所迫無令鬚汧

土遂伏劔上聞而憐之賜洛陽城旁塚地穀千斛縑五百匹除序子壽爲郎遷鄒平侯相壽夢序告之曰久客思鄉里壽即棄官上書乞將序骸骨葬舊塋詔許焉冬十二月癸巳詔曰間者以軍旅未解用度不足故行十一之稅今徃徃屯田其令郡國田租三十稅一如舊制焉馮異在關中久求還京師上不聽有人上書言馮異專制關中威福自由號咸陽王上以章示異惶恐謝曰臣本諸生遇受命之會過蒙顧盼充備行伍班大將爵爲通侯雖受任方面豫有微功此皆國家謨謀非臣所及也臣伏自思惟奉承詔旨則戰無不剋率臣私心則未嘗不悔陛下獨見之明

久而益遠乃知性與天道不可得而聞也當兵革始起豪傑競逐臣在傾側之中尚無過差之志況天下平定上尊下卑者乎誠宜謹守愚忠以自終始伏願明主知臣素心詔曰將軍之於國家義則君臣恩猶父子何嫌何疑而有懼意是冬馮異岑彭朝京師上謂公卿曰馮將軍是我兵起時主簿也使中黃門賜異珍寶衣服詔曰倉卒無蕪羹亭豆粥呼沱河麥飯也異謝曰臣聞管仲謂桓公曰願君無忘射鉤臣無忘檻車齊國賴之臣願陛下無忘父城則百寮蒙恩天下幸甚後遣異將妻子西彭亦數宴見厚加賞賜既而還南使過家上先人冢詔大長秋朔望問夫人

起居詔諸侯就國耿純上書願奮擊公孫述又陳前在東郡誅涿郡太守朱英親屬涿郡誠不自安乃更封純爲東光侯上曰文帝謂周勃曰丞相吾所重也君爲我率諸侯就國今亦然哉紀遂就國弔死問傷國中愛之

袁宏曰夫萬物云爲趣舍不同愛惡生殺最其甚大者也縱而不一亂亡之道故明王制設號令所以一物心而治亂亡也今誅惡之臣內懼私憾不慮其弊從而易之是下用情而法不一也不一則多變多變則害生故王者之所保在於法一而不變乎靈壽侯邳彤薨世祖既平邯鄲遣任光還信都更封陵鄉侯

後漢紀卷五
李忠為中水侯遷丹陽太守治甚有稱為天下第一

後漢光武皇帝紀卷第五

後漢光武皇帝紀卷第六

袁宏

七年春正月丙申詔天下繫囚非殊死者一切勿治
是時海內新安民得休息皆樂吏職而勸農桑風俗
和同人自修飾上惟王莽偽薄之化思有以改其弊
於是黜虛華進淳朴聽言觀行明試以功名實不相
倣競乃下詔曰世俗不以厚薄為鄙陋富者過奢貧
者殫財刑法不能禁禮儀不能止倉卒以來乃知其
咎布告天下令知忠臣孝子薄葬送終之義癸亥晦
日有蝕之詔曰陰陽錯謬日月薄蝕百姓有過在予
一人其赦天下公卿百寮各上封事無有所諱舉賢

良方正各一人於是馮衍上書陳事一曰顯文德二
曰褒武烈三曰修舊功四曰招俊傑五曰明好惡六
曰簡法令七曰差祿秩八曰撫邊境書奏上將召見
之後以讒不得入

袁宏曰夫讒之爲害天下之患也闇主則理固然矣
賢君而讒言不絕者豈不哀哉夫人君之情不能不
形於外夫好惡是非之情形於外則愛憎毀譽之變
應於事矣故因其所好而進之因其所惡而退之因
其所是而美之因其所非而疾之惡而於無嫌之地
而人主不必悟者讒人之所資也夫讒人之心非專
在傷物處之不以忠信其言多害也何以知其然夫

欲合主之情必務求其所欲所惡者一人所害者萬
物故其毀傷不亦衆乎若夫聲色喜怒之際虛實利
害之間以微售其言焉可數哉是以古之明君知視
聽之所屬不能不關於物也知一己之明不能不滯
於情也求忠信之人而置之左右故好惡是非之情
未嘗宣於外而愛憎毀譽之言無由而至矣二月癸
亥晦日有蝕之是時宰相多以功舉官人率由舊恩
天子勤吏治俗頗奇刻因是變也太中大夫鄭興上
疏曰臣聞國無政不用善則取謫于日月之災故政
不可不慎也其道務三而已一曰擇人二曰因民三
曰從時此應變之要也昔在帝堯洪水滔天帝求俾

又嶽曰鯨哉帝知鯨不可然猶屈已之是從嶽之非
重違衆也昔齊桓公避亂於莒鮑叔從焉既反國鮑
叔舉管仲桓公從之遂立九合之功晉文公奔翟從
者五人既得晉國將謀元帥趙衰以郟穀爲閔禮樂
敦詩書使將中軍而五子下之故能伏強楚於城濮
納天子於王城今衰職有闕朝論輒議功臣功臣用
則鮑趙之舉息矣願陛下上師陶唐下覽齊晉以成
屈已從衆之德以濟群臣舉善之美臣聞上竭聰明
則下懼其罪故曰者君象也月者臣象也君威亢急
則臣道迫促願陛下留神寬恕以崇柔克之德不從
與字少贛河南開封人嘗從劉歆學講議歆美其才

學者皆師之興既之涼州坐事免會赤眉作亂東道
不通興乃歸隗囂囂貳於漢興每匡諫言辭懇至囂
雖內不能悅而外相崇禮興求歸葬父母囂不聽而
徙舍益祿興見囂曰昔嘗同僚故歸骸骨非敢爲用
也求爲先人遺類耳幸蒙覆載得自保全今乞骸骨
而徙舍益祿興聞事親之道生事之以禮死葬之以
禮祭之以禮奉以周旋不敢失墜今爲父母乞身得
益祿而止是以父母爲請也無禮甚矣將軍焉用之
囂曰幸甚乃爲辦裝使與妻子俱上聞興歸徵爲太
中大夫光祿勳杜林上書薦興曰執義堅固敦於詩
書好古博物見疑不惑宜侍帷幄以益萬分於是敬

異焉每朝有大議輒訪問興上嘗以郊祀事問曰欲以讖決之何如興對曰臣不爲讖上怒曰卿不言讖非之邪興曰臣於書有所未學而無敢非上乃解曰言不當若是邪興數言事文辭溫雅然以不合旨又不善讖故不得親用有子曰衆以才學知名其後皇太子及山陽王因虎賁將梁松束帛聘衆衆謂松曰太子儲君無外交之義漢有舊制禁王不得私通賓客遂辭不受松曰長者意不可逆也衆曰犯禁得罪不如守正而死太子及王聞之嘉其不強及梁氏敗賓客多坐之衆不染於辭夏五月前將軍李通爲大司空秋隗囂遣步騎三萬侵三輔耿弇遣數百騎與

戰爲囂所破囂將分兵取柁邑馮異聞之馳據其城諸將皆曰虜兵乘勝不可爭鋒異曰若虜得柁邑則三輔動矣攻者不足守者有餘今先據柁邑以逸待勞非所謂爭鋒也遂馳入柁邑閉城偃旗鼓囂將不知直來攻城異擊鼓建旗成列而出囂軍亂遁異大破之追奔數十里於是北地諸豪帥相率而降諸將多有言功者異獨默然上璽書勞異曰柁邑孤危亡在旦夕諸將狐疑莫有先發將軍獨決奇筭摧敵殄寇功如丘山猶若不足雖孟反後入無以過也今遣太中大夫賈豎藥殞殮之具以賜吏士其死傷者大司馬已下親弔問之以崇謙讓於是三軍之士莫不

感悅

袁宏曰謙尊而光於是信矣馮異能讓三軍賴之善乎王之言謙也楊朱有言行賢而去自賢之心無所往而不美因斯以談聖莫盛於唐虞賢莫高於顏回虞書數德以克讓爲首仲尼稱顏回之仁以不伐爲先邈至於善兵在其頸處父上人終喪其族然則克讓不伐者聖賢之上美矜善上人者小人之惡行也司馬法曰苟不伐則無求無求則不爭不爭則不相掩由此言之民之所以和下之所以順功之所以成名之所以立者皆好乎能讓而不自賢矣夫人君者必量材任以授官參善惡以毀譽課功過以賞罰者

也士苟自賢必貴其身雖官當才斯賤之矣苟矜其功必蒙其過雖賞當事斯薄之矣苟伐其善必忘其惡雖譽當名斯少之矣於是怨責之情必存於心希望之氣必形於色此矜伐之士自賢之人所以爲薄而先王甚惡之者也君子則不然勞而不伐施而不德致恭以存其德下人以隱其功處不避汙官不辭卑唯懼不任唯患不能故力有餘而智不屈身遠咎悔而行成名立也且天道害盈而鬼神福謙凡有血氣必有爭心功之高者自伐之責起焉故宋公三命考父偃僕晉帥有功士燮後歸孟側殿軍策馬而入三卿謀寇冉有不對其所以降身匿迹如此之甚也

何誠知民惡其上衆不可蓋也夫逆旅之妾惡者自以爲惡主忘其惡而貴焉美者自以爲美主忘其美而賤焉夫色之美惡定於妾之面美惡之情變於主之心况君子之人有善不敢識有過不敢忘者乎其爲美亦以弘矣故揚子之言足師逆旅之妾足誠也八年春正月來歙自陽城將二千人斬山開道徑至畧陽襲囂將金梁等殺之因保其城上聞之喜甚左右怪上數破大敵今得小城何足以喜上以畧陽囂之所阻腹心已壞則制其支體先是吳漢諸將在長安者兵雖盛以梁屯守不得上隴及梁死歙據畧陽乃爭馳赴之上以爲囂失所恃矣亡其要城勢必悉

以精銳來攻曠日久圍而城不拔士卒頓弊乃可乘危而進皆追漢等還囂果自將數萬人攻略陽激水灌城晝夜攻歙歙率勵吏士同心固守數月不拔囂衆疲弊夏閏四月上西征至漆議者以爲車駕不宜入險且遣諸將觀虛實議未定會馬援夜至勸上曰囂衆瓦解兵進必破以米爲山谷於上前指衆軍所入處上笑曰虜在吾目中矣車駕遂進竇融與五郡太守將步騎數萬輜重五千兩與上會第一上置酒引見融等待以殊禮囂衆大潰城邑皆降囂將妻子保西州吳漢岑彭引兵追守之囂將王元入蜀上嘉融功以四縣封融爲安豐侯融弟友爲顯親侯於是

以次封竺曾爲助義侯梁統爲歸義侯史苞爲褒義侯庠均爲輔義侯辛彤爲扶義侯旣而皆遣還西融兄弟竝受爵位久專方面懼不自安數上書求代上不許蜀人聞隗囂敗百姓震動成都郭外有秦時舊倉王莽以來常空公孫述乃詐使人言下倉出穀積如山陵百姓空市鄜往觀之述乃會百官問曰下倉竟出穀乎對曰無有述曰言隗王敗亦復如此矣欲以此安衆心者也蜀人荆邯說述曰兵者帝王之大器古今所不能廢也昔秦失其政豪傑竝起漢祖無前人之遺迹立錐之地起於行陣之間身自奮擊與項羽戰小大百餘軍破身困者數矣然猶不止故軍

敗復合創愈復往何則前死成功愈於就滅亡也隗囂遭遇運會割有雍州兵強士附威加山東時漢更始復失天下衆心引領四方瓦解囂不及此時以爭天命而退欲爲西伯之事尊師章句賓友處士偃武息兵卑辭事漢喟然自以爲文王復生也今漢帝釋西顧之憂專精東伐四分天下而有其三則西州豪俊咸居心於山東間使相聞至於五分而有其四則舉兵伐之遂以屠潰是則然矣若天水已平漢九分天下而有其八陛下以梁州之地內奉萬乘外給三軍百姓愁困不堪上命將有王氏自潰之變臣之愚計以爲宜與漢和親不者當及天下之望未絕豪傑

尚可驅動急以時悉發國內精兵令田戎據江陵臨
江南之會築壁堅守傳檄吳楚則長沙以南必隨風
而靡令延岑出漢中定三輔天水隴西拱手自得如
此海內震搖異有大利也述欲從其言蜀人及述兄
弟以爲不可述遂止延岑等數請兵願立功終疑而
不聽由是皆怨唯公孫氏任政述性酷急數誅殺察
於小事如治清水而已少爲郎習漢家制度出入法
駕鸞旗旄騎置陳陛戟輦出房闥又立其兩子爲王
食犍爲廣漢各數縣或諫曰成敗未可知戎士暴露
而王愛子示無大志述不勝情卒皆王之穎川盜賊
起京都騷動秋八月上還洛陽謂執金吾寇恂曰卿

著威信於穎川獨卿能平之從九卿復爲二千石以
憂國可也恂對曰穎川聞陛下西征以爲隴蜀未定
故狂狡乘間相誑誤耳如陛下升輿南面臣願執銳
在前賊必惶恐歸死即日車駕南轅至穎川盜賊悉
降百姓遮道曰願從陛下復借寇君一年上乃留恂
穎川撫吏民受餘降冬十一月公孫述將救囂乘高
卒至漢兵未及陣囂得逃出入冀漢軍食盡吳漢岑
彭燒輜重歸長安天水諸縣復反爲囂十二月高句
麗王遣使奉貢東郡濟陰盜賊起大司空李通橫野
將軍王常率舟師擊之上以耿純威信著於衛地即
拜純爲太中大夫與兵會於東郡東郡聞純入界盜

賊九千餘人降兵不戰而還爾書復以純爲東郡太守

九年春正月征虜將軍祭遵薨遵忠蓋廉潔毀已財爲國賞賜皆以賑吏士身寢布被妻子惡衣食上以是重焉雖在軍旅其所進禮皆儒術之士讌會遊處必雅歌投壺遵喪至河南詔遣百官詣喪所上乃素服臨之望城舉音哀慟左右旣還復幸城門過其車騎涕泣不能已詔河南尹護喪事大司農給其費喪禮成復臨祠以太牢如孝宣帝臨霍光故事贈以將軍侯印綬謚曰威侯賜朱輪容車介士遵引旣葬車駕復親臨墳墓問其室家上歎曰安得憂國奉公之

臣如祭征虜者乎衛尉銚期進曰陛下念祭遵不已羣臣皆內懷慙懼遵之見思若此是春隗囂病死囂將皆降唯高峻不下峻嘗降漢已復歸囂故懼誅不降立囂小子純初王莽末天水童謠曰出吳門望緹雲見一蹇人言欲上天令可上地安得民囂少病蹇吳門者卽冀郭門也來欵說上曰隗囂雖死西州未平公孫述以隴西天水爲蕃蔽故得延其軀命如二郡旣平則述計窮矣昔趙以賈人爲將高祖懸以重賞今隴右新破百姓饑饉可以利動時也宜益資軍實以誘未附令誠知國用不足民勞於內然天下未定不得休息上從之於是糧穀器物不絕於道冬來

歙馮異入天水破迷將王匡田弇諸縣悉降自王莽末西羌寇隴西金城入塞內隗囂不能討因撫集以爲強歙奏言非馬援莫能定乃以援爲隴西太守援至擊先零大破之降者萬餘人援上疏曰亢吾以西數十里一城城皆完堅舊制置塞因山阻每其蹊徑輒有候尉故虜不得妄動即棄亢吾以西北爲殖養虜根內自迫促宜及兵威疾往除之金城諸縣皆田地肥美漑灌流通自有本民易還亢實誠不宜有所斷棄若二郡平定流民還本業不復爲國家憂於是詔竇融悉還金城客民三千餘戶援爲置長吏繕治城郭起塢候勸耕田郡未樂業羌虜悉降援以郡新復務開寬信舉大體而已賓客故人滿門下諸曹時白事輒曰此丞掾之任何足相煩若大姓侵小民黠羌不從令此乃太守事耳旁縣嘗有報怨者吏民驚言羌反百姓奔城郭狄道長請閉城門發兵援時方與賓客飲大笑曰羌虜何敢復犯我曉狄道長令歸寺良怖急者各牀下伏後稍定郡中乃服三月封楚王子般爲菑丘侯頃之徙封杼秋侯上幸沛詔問郡中諸侯有事行者太守言般至行爲諸侯師天子嘉之恩禮甚厚吳漢王霸諸將征劉芳於高柳匈奴救芳漢兵不利引軍還璽書以霸爲上谷太守

十年夏征西大將軍馮異攻洛門未下薨謚曰節侯

異謙退不伐每軍行止舍諸將爭功異嘗屏處大樹下軍中號爲大樹將軍上嘗分諸營吏士問曰屬誰營邪皆曰願屬大樹將軍上以此重之非合戰受敵異嘗處衆營後與諸將相逢引車避之士卒不得爭功進止皆有旗幟號爲嚴整子彰嗣上追思異功封小子訢爲祈鄉侯秋八月己卯幸長安祠高祖廟上將討高峻寇恂諫曰車駕止長安隴西足以震懼且去關東不遠此從容一處而制四方今士馬勞倦遠履險阻非萬乘之固也前年潁川之役可以爲戒上不從進及汧高峻不降上謂恂曰公前止吾今爲吾行矣恂至第一峻遣軍師皇甫文詣恂辭禮不屈恂

怒將斬之諸將曰高峻兵精今欲降之而斬其使不可恂遂斬之遣其副歸峻即日開城與隗純等降諸將皆賀因曰敢問殺其軍師何以反降恂曰皇甫文峻之腹心所取也今來觀望其意不屈是不欲降殺之峻亡其半以是動心故知其必降諸將皆曰非所及也峻與諸隗徙關東頃之隗純將數十騎亡入匈奴追斬之吳漢王霸擊劉芳芳將胡騎會平城下連戰大破之是時芳與匈奴連兵烏丸數爲寇盜緣邊愁苦霸乃築塢候起亭鄣自代郡至平城三百餘里霸數上書言邊事宜與匈奴和親又言委輸可從溫水以省陸轉之勞後皆施行霸愛士卒死者解衣以

歛之傷者輟食以哺之在上谷二十餘年與匈奴數十百戰士卒皆爭為効力是歲執金吾寇恂衛尉銚期薨恂居九卿位饗大國租皆以施朋友賑給故人常曰吾所以自至於此者士大夫之力也可不共乎恂學行竝修名重朝廷議者稱其有宰相器會恂早薨莫不痛惜謚曰威侯恂兄弟及兄子姊子以軍功侯者八人恂數言閔業之忠上以為關內侯官至遼西太守

袁宏曰夫世之所患患時之無才也雖有其才患主之不知也主既知之患任之不盡也彼三患者古今之同而御世之所難也觀寇恂之才足居內外之任

雖蹇撫河內再綏潁川未足展其所能也及在汝南延儒生受左氏何其閑也晚節從容不得預於治體夫以世祖之明如寇生之智能猶不得自盡於時況庸主乎期為將嘗先登陷陣手自斬獲軍每不利賴期得振者甚數為人重信義雖破邑降城未嘗虜掠在朝見不善必犯主之顏上嘗與期門近出期頓首車前曰臣聞古今之戒變生不意臣誠不願陛下徼行數出天子為之迴輿期疾病其母問嗣者期曰受國重恩常懷慙負若死不知何以報國何議嗣乎上親自臨襚謚曰忠侯

十一年春三月巳酉上幸南陽過章陵祠園廟初公

孫述遣大司徒任滿翼江王田戎將數萬人據荆門
浮橋橫江以絕水道營壘跨山以塞陸路上遣吳漢
岑彭臧宮將六萬兵擊荆門詔岑彭曰大司馬習用
騎兵不曉水戰荆門之事一由征南而已閏月吳漢
岑彭率師攻之時天東風吹船逆流直衝浮橋因放
火燒之風怒火盛短兵接戰蜀兵驚怖大軍遂順風
並進所擊無前任滿溺死者數千人田戎退保江州
岑彭遂長驅入江關令兵無得鹵掠所過不受牛酒
見耆老陳漢恩德百姓無不欣悅開門請降吳漢臧
宮自後而進六月來欽蓋延入武都攻述將王元破
之乘勝遂進蜀人震恐遣刺客刺欽刀未出欽召蓋

延延至見欽涕泣不能仰視欽叱延曰虎牙何以敢
爾今使者中刺客無以報國故呼巨卿欲相屬以軍
事而反効兒女子啼泣乎刀雖在身不能勒兵斬卿
邪延拭淚具受所勅辭畢抽刀而卒立聞之悼痛無
已贈中郎將印綬謚曰節侯喪還洛陽車駕臨弔送
葬哀慟歔歔所褒顯賞賜甚厚長子褒嗣上嘉欽忠
節封欽弟由爲宜西侯欽爲人信厚言行不相違雖
銜命數年出以喻囂然往來之言皆可復也上之臨
喪趙玉良與張邯相逢城門中道迫狹叱邯旋車頃
良怒召門候岑遵困辱之司隸校尉鮑永奏良大不
敬良尊重莫貳上雖不從而羣臣嚴憚焉永辟平陵

人鮑恢為都官從事恢亦抗直不避強禦詔曰貴戚且斂手以避二鮑其見重如此永字君長上黨屯留人父宣守正不虧為王莽所誅莽欲滅其子孫上黨都尉路平承旨欲害永太守苟諫嘉宣忠節置永府中護全之未數為諫陳安漢室禽奸臣之策諫戒永曰機事不密則害生禍倚人門會諫喪路平復收永弟升會新太守趙興至歎曰我受漢茅土不能致身立節鮑宣之死豈可害其子邪勅縣出升復召永為功曹時有稱侍中止傳舍者興欲出謁永以為非真不宜興遂駕往永當州門拔佩刀截鞅興為還車數日詔書下捕之果矯稱使者由是知名自魯郡太守

為司隸行縣至霸陵過更始塚引車將下從事諫止之末曰北面事人忍不過其墓雖以獲罪司隸不避也遂下車盡哀至右扶風上苟諫冢上曰奉使如此可乎太中大夫張湛對曰仁者百行之宗忠者禮義之主仁不遺舊忠不忘君行之高者也上悅初雲陽人宣秉字巨卿為御史中丞遷司隸校尉務舉大體闊畧微細其政嚴而不苛百僚亦敬憚之上幸其府見秉布被瓦器食則魚食歎曰雖楚之二龔不能過也即賜幃帳器物拜為司徒司直俸祿皆以分九族家無擔石之儲東海王良字仲子亦為司徒司直行大司徒事居貧守約妻子不之官司司徒掾鮑恢嘗以

事至蘭陵過良家見一婦人負柴而入不知是良妻也恢謂曰我司徒掾也將歸京師夫人得無有書乎婦人曰苦掾無書既而問焉乃良之妻也恢歎息而去故良之清貧聞於天下良謝病歸天子備禮徵不得已載病至京師道過友人友人闔門不內曰不有忠言竒謨以取大位是無其德也曷為往來屑屑不憚煩邪謝而不見良遂稱病篤而歸終身不起冬岑彭以江州城固而糧多留馮俊守之彭引軍從涪江擊平曲述遣汝寧王延岑大司空公孫恢將軍王元距廣漢大司徒侯丹距黃石彭令臧宮擊岑等自泝都江擊侯丹破之時岑等盛兵沅水官兵則千餘人

降附者四五萬口軍食不足蜀民各堅壁觀形勢宮欲還恐為虜所制會謁者將數百兵詣岑彭宮乃矯制取謁者兵踈行陣而多旗鼓蜀人聞漢兵卒至登山望之旌旗滿谷呼聲動山莫不震懼宮因其懼縱兵大破之斬公孫恢死者萬餘人王元降即遂乘勝而前所至皆降岑彭既破侯丹晨夜兼行二千餘里徑赴武陽別遣精騎馳廣都去成都數十里所至皆奔散遂大驚以杖擊地曰是何神也彭所營地名彭亡彭惡之欲徙會日暮其夜蜀遣刺客刺彭彭死彭首破荆門長驅武陽將兵齊整為巴蜀所稱百姓思之為立廟武陽謚曰壯侯上思彭功封其庶子淮為

穀陽侯上爲書喻公孫述示以成敗述得書歎息以示允祿勳張隆隆勸述降述曰廢興命也豈有降天子哉左右莫敢言岑彭之死吳漢將精兵二萬自夷陵出犍爲

十二年春吳漢到南安擊述弟永於魚涪津破之遂降武陽初漢入犍爲界諸縣多城守詔令漢直到廣都據其心腹諸城自下漢意難之旣進兵廣都諸城皆降又詔漢曰廣都去成都五十里述若來攻待其困弊而攻之勿與爭鋒述若不來轉營逼之彼必堅壁漢以連戰輒勝便進兵去成都十里漢自將步騎二萬餘人水北作營遣副將劉尚將萬餘人於南爲

營相去二十餘里上聞之大驚讓漢曰如述出兵連綴副營副營破即公營亦破矣恐公不能自還自天也幸尚無他者急還廣都三月癸酉詔曰巴蜀民爲人所掠者免爲庶人夏六月黃龍見于河東秋七月馮駿破江州殺田戎九月述遣司徒謝豐執金吾袁吉將十餘萬人攻吳漢分兵守劉尚漢力戰不利漢謂諸將曰吾與諸軍逾越險阻轉戰千里今深入敵地在其城下勝則成功敗則無餘成敗在一舉矣前夾江爲營戰數不利今欲徙水北營合於水南同心一力人自爲戰何有不克哉饗士秣馬潛軍夜合水南營述不知乃分兵距水北營自將攻水南營漢迎

擊大破之斬謝豐袁吉會臧宮至兵馬甚盛遂進軍城下述自將數萬人出戰吳漢縱銳士奔之刺述洞胷輿至營以兵屬延岑其夜述死明旦岑舉城降吳漢悉滅公孫氏并誅延岑漢燔燒百姓縱兵大掠上聞之詔讓吳漢劉尚曰城中老母嬰兒口以萬數兵火大縱可爲酸痛甚違古人弔民之義公等戴天履地何忍行此邪初漢軍糧盡具舟將退謂蜀郡太守張堪曰禍將至矣軍有七日糧而轉運不至必爲虜擒不如退也堪乃止漢使毀軍以挑述述果出戰遂以破述成都旣平堪先入其城府藏珍寶皆有簿券秋毫無所取慰撫吏民蜀人喜悅後遷漁陽太守凶

奴嘗以萬騎入漁陽堪以數千騎擊破之威震北邊漁陽大治堪字君遊南陽宛人明帝時問蜀郡計掾樊顯曰前後太守誰最賢顯曰漁陽太守張堪仁足以惠下威足以擒姦前公孫述破時珍寶山積捲握之物足富十世而堪獨乘折轅車布被囊而已上聞顯言歎息良久方徵堪會病卒天子悼惜之大司空李通以疾罷通以布衣唱謀有佐命之功又尚寧平公主甚見親重通性謙恭常欲避權勢自爲宰相謝病不視事連年乞骸骨上輒優喻之以三公歸第養疾通後固請罷相以特進侯奉朝請常與高密膠東侯參議大事車駕每幸南陽遣使使祠通父守冢實

融與五郡太守還京師官屬賓客轉轂千餘兩融至上京州牧張振屬國都尉安豐侯印綬上遣使還侯印綬引見就諸侯位賞賜恩寵傾京師以梁統爲太中大夫數月拜竇融爲冀州牧俄拜大司空融以非國家舊臣而爵位與吳公竝每朝會進見辭禮甚恭上愈親厚之融久不自安數辭讓爵位因侍中金遷口達至誠又上疏曰臣融年五十三有子年十五質性頑鈍臣朝夕教以經藝不得令見天文識記誠欲令肅恭畏事恂恂修道不願其才能何況乃當傳以連城主侯故國哉每請問求見上輒不許融嘗罷朝遂巡席後上知融欲讓使左右扶出之他日將會先

詔融曰曩者知公欲讓今相見宜論他事勿復言其殷勤若此梁統在朝數言便宜上書陳法令輕重宜遵舊典曰臣聞人君之道仁義爲主仁者愛人義者治理愛人故爲之除殘治理則爲之去亂是以五帝有流殛之誅三王有大辟之刑所以經世教民除殘去亂也故孔子曰理財正辭禁民爲非曰義高帝受命奄有天下制法定律傳之後世不易之科也文帝寬柔省去肉刑他皆率由舊章幾致刑措武帝因資財富多出兵命將征伐遠方軍沒民疲豪傑犯禁故增其二科懲不盡節宣帝聰明親覽萬機臣下奉憲不失繩墨元帝法令少所改更而天下稱治至於成

帝繼體哀平即位日淺丞相嘉等猥以數年之間虧除先帝舊律百之餘事成不厭人心尤妨政事伏見陛下權時撥亂博施濟民功逾文武德侔高皇而反循季世末節襲乘衣微之軌非所以還初反本據元更始也願陛下擇其善者而從之其不善者而改之定不易之典垂無窮之制天下幸甚事下公卿光祿勳杜林諫曰夫人情挫辱則節義之心損刑網繁密則苟免之行生聖帝明王知其如此故深識遠慮動居其厚故湯去三面之網易著三驅之義所以德刑參用而示民有耻漢德寬厚民無二心軍士左袒樂爲劉氏多恩之所致也至其後世不能以德而勤於

法故有吹毛求疵詆欺無限桃李之饋集以成事於是家無全行國無廉夫上下相循法不能止而仁義之風替矣陛下覽得失之要深知其原故破觚爲圓建斷爲樸法簡易遵網疏易從海內頌政不勝其喜宜如舊制上從林議統徒封陵鄉侯出爲九江太守治甚有迹吏民畏愛之統有子九人而松最知名次竦弱冠能教授善屬文

袁宏曰自古在昔有治之始聖人順人心以濟亂因去亂以立法故濟亂所以爲安而兆衆仰其德立法所以成治而民氓悅其理是以有法有理以通乎樂治之心而順人物之情者豈可使法逆人心而可使

衆兆仰德治與法違而可使民氓悅服哉由是言之
資大順以臨民上言之道也通分理以統物不易之
數也降逮中世政繁民弊牧之者忘簡易之可以致
治御之者忽逆順之所以爲理遂隳先王之大務營
一時之私議於是乎變詐攻奪之事興而巧僞姦吏
之俗長矣陵遲至於戰國商鞅設連坐之令以治秦
韓非論捐灰之禁以教國而修之者不足以濟一時
持之者不能以經易世何則彼誠任一切之權利而
不通分理之至數也故論法治之大體必以聖人爲
準格聖人之所務必以大道通其法考之上世則如
彼論之末世則如此然則非理分而可以成治者未

之聞也若乃變詐攻奪之事興而飾智謀權冊以勝
之巧僞姦利之俗長而設禁網陷穽以餌之患時世
之莫從懸財賞行罰以驅之毒爲下之訐逆厚威網
殺伐以服之斯所謂勢利苟合之末事焉可論之以
治哉先王則不然匡其變奪則去其所爭救其巧僞
則塞其淫情人心安樂乃濟其難以悅之又何不從
之有焉人之情惡侵則正其分以齊之又何訐逆之
有焉推此以治則雖愚悖凶戾者其於身也猶知法
治所以使之得所而安其性者也故或犯治逆順亂
倫反性者皆衆之所疾而法之所以加是警一人而
千萬人悅則法理之分得也夫然則上下安和天下

後漢紀卷六
悅服又何論於法逆於理理與法違哉

後漢光武皇帝紀卷第六



